

1

Dictada occitana n° 17

Lo 25 de genièr de 2014

**Sèrgi Viaule, *Escorregudas en Albigés*.
(Edicions *Lo Clusèl*, colleccion “Racontes”, Quasèrn n° 2, 2012, p. 51)**

La Regòla de la Montanha Negra

Sabi pas per de qué m'èri metut dins l'ase de me crompar una bicicleta nòva. A! Si! Aquò me torna. Un jorn passèri davant un magasin de cicles. Dins la veirina vegèri un velò plan presentat.

(42 mots)

(Aicí s'arrèstan los pichons.)

Èra polit e m'agradèt. Foguèri coma victima d'un còp de fòlzer, o puslèu d'un còp de còr. Èra un VTT. Un “Velò Tot Terren”, per en cas ont n'i auria encara que coneisserian pas la significacion d'aquesta sigla.

(42 + 38 = 80 mots)

(Aicí s'arrèstan los collegials.)

N'aviái ja un de VTT, mas tot d'una decidiguèri qu'aviái fach son temps. Dins l'afar d'un beleg, trapèri totas las rasons del monde per justificar sa vetustat. Coneissètz la dicha: “*Un gos de tròp ven un gos enrabiât.*”

(80 + 38 = 118 mots)

(Aicí s'arrèstan los liceans.)

Cossí que ne vire, dintrèri dins la botiga e faguèri lèu l'afar. Atal me retrobèri amb una bicicleta tresludenta d'en pertot e pas sonque dels cròmes del guidon e de las gelhas. La quita pintra lusissiá. Èra calhòla, de color negra e jauna. Auriatz dich una blanda. Podètz creire qu'aviái fièr anar, mon adquisicion novèla. Èri content coma un perdigalh, si que non coma un mainatge un matin de Nadal que descobririá una bicicleta dins son esclòp.

(118 + 77 = 195 mots)

Remarcas : toleràncias ortograficas :

- « perdigalh » (Ubaud) o « perdigal » (Laux, Ubaud)
- « si que non » (Laux) o « siquenon » (Ubaud)